

四庫全書

史部

欽定四庫全書

浙江通志卷二十八

學校

四書院附

金華府

金華府儒學

在府治西

嘉靖浙江通志宋初在縣東慶

厯間知州關詠徙子城外熙寧間知州蘇頌徙子

城內西南大觀二年校官葉夢得徙今所又請司

理院及竹木場地廣之元皇慶間兵燬憲臣敬儼

楊友直相繼修復明一統志洪武初重建

金華府志明太

祖取婺州改寧越府命知府王宗顯開郡學延儒士葉儀宋濂為五經師戴良為學正吳沈徐原等為訓導時喪亂學廢至是始聞絃誦之聲萬厯金華府志正統二年燬

知府蔣勸重建

錢習禮為記

成化中知府周宗智弘治

中知府韓燾加葺

國朝順治三年燬五年知府張安豫重建

自為記

康熙五

年知府吳紳十七年知府張蓋相繼重修雍正九年知府馬日炳濬泮池圍以石欄重修櫺星門

射圃

名宦祠

祀丁潭以下
四十六人

鄉賢祠

祀顏烏以下
一百十三人

麗澤書院

在旌孝
門外

嘉靖金華縣志宋呂成公作

書堂於城西觀前二湖悅焉取易兌象之義以麗

澤名及卒鄉人為祠宇以祭淳祐間郡守許應龍

建於雙溪之許咸淳間徙今所元至元間重建明

成化間僉事辛訪令郡守李嗣重建祀晦菴南軒

東萊三先生

正學書院

在旌孝
門外

金華縣志元浙江行省建祀

郡儒何基王柏金履祥許謙明成化十四年僉事
辛訪奏請特額郡守李嗣重建萬厯元年增入章
懋稱五賢祠崇禎十六年燬

麗正書院

在府治西北

雍正四年知府張坦讓即金

衢嚴道故基建中奉朱文公呂成公張宣公并何
王金許四先生為七賢祠前設講堂列齋左右以
為書院

金華縣儒學

在光孝觀址

嘉靖浙江通志宋以前附於

府學嘉靖金華縣志元至元十三年始創於醋坊

嶺大德三年廉訪副使高伯元改建於夏塘萬厝

金華府志皇慶元年燬泰定四年憲司經歷袁永

澄以門北向遷明初燬同知潘廷堅知縣王興宗

重建永樂甲辰復燬知縣郭瑛建楊士奇為記天順間

知縣林恂修

林文為記

正德壬申知縣李玘修

章懋金華縣儒

學記正德己巳玉山李侯玘謁廟視學將圯喟然

太息有志修葺而兩值艱歲費無所出乃錄積公

用之餘至於壬申之春始克興事其文廟若西廡

若兩齋則易其朽敗新其漫漶而增飾之惟東廡

及講堂頤圯已甚乃重作焉堂東西作為廨舍以居其師齋後則為米廩以食其士又於堂後建閣以藏經籍其下為栖士之室而四圍有廂且濬渠引沆於其前以絕蠶塵而來清泚因名其閣曰清源使諸生講肄之餘於是而玩適焉侯亦時之學與諸生討論經義商榷古今視其所學而勸勵程督焉金華在昔碩儒名公輩出道學若東萊兄弟與何王金許諸賢著述傳於後世學行氣節若潘默成勲業若鄭忠愍謹言善政若王莊敏煥章兄弟若王忠簡端明父子皆聲實卓乎當時非其學之為已而清明在躬者能若是乎邑人君子來遊於是者因其作新之機勵其景行之志奮然從事於為已之學使先正之氣脈於是乎並昌天下國家將有賴焉

嘉靖十七年同知

蕭弘魯知縣姚資修三十六年知縣顧曾唯廣其

址而重新之

姜良翰為記

萬歷金華縣志萬歷間邑令

汪可受得光孝觀址遷建後知縣熊鳴夏買民居

廓之

陸可教金華縣學記吾郡附郭之邑自建學以來士之自奮者踵相接蓋起家為賢公卿

以風節事功名世者若而人矣而通歲不無少讓於前或曰學地福且庫又左壓於方岳大吏之分省斯其故歟於是前令汪君可受度地得光孝觀負陰抱陽博大爽塏實稱絃誦之區遂撤而徙之而門巷迂曲民居前屏市雜喧囂多士出入頗病之今令熊君鳴夏治邑逾四年乃盡哀公私之積市民居撤之繚以周垣中通直道前為傑閣顏曰聚奎內為泮池縱廣若干尺先是觀後有聖覽亭易為尊經閣南北屹然對峙景行在望前眺雙溪滌洄如帶遠郡城而西注焉多士出入遊息於斯

其必有勃然而動惕然
而思曠若發蒙者矣

四十四年知縣解學龍重

修

葉官
為記

國朝順治十年知縣王世功康熙十七年知縣王治國

教諭鄭濂訓導沈麟趾重修

王治國
自為記

射圃

名宦祠

祀王興宗
以下五人

鄉賢祠

祀潘良貴以
下三十一人

社

學

四所
圮

北山書院

在盤
溪上

續文獻通考宋末為何基立

山橋書堂

在縣
治北

金華府志宋王埜建

圮

蘭谿縣儒學

在縣治東

嘉靖浙江通志宋宗寧間建萬

歷金華府志紹興間知縣柴紱重建咸淳庚午知

縣薛至增修元陞州學至治初知州爪爾佳蘇爾哈

圖增拓之

吳師道重新蘭谿州學記蘭谿升縣為州餘二十年任守牧者襲有興作神祠

之修醫宇之崇官舍亭傳之新咸出意相勝獨學宮在城東因舊制卑陋日就圯朝廷右文開科風厲鼓舞是宜在所急而曾無一人顧省者豈所謂知本哉至治元年知州爪爾佳侯銳意改作歷夏徂秋中外告功殿庭門堂齋廡視舊咸闢周垣夾廡官署庖庾實昉於今嚴嚴翼翼始肅其觀未幾去官事遂格今知州崔侯雲翼慨然葺其緒補其缺飾其所未及而州判王君淮復贊助而督之既底

績職教者朱天富來請文謂爪爾佳侯能新之於數月之間而六年之後得崔侯乃完二侯之功皆宜書也既直紀其事而復為之說曰天下事後出者必有加於前而俗之趨下者常莫能挽而歸於古安宅廣居人孰無之博厚高明可以自致如使宏其宮而人之眇新其室而習之污則賢州侯之意荒矣故愚願以諗於衆庶其遊居周旋仰瞻俯察警悚振飭思所以稱是而度越於前人哉

明

復縣學永樂中知縣宋哲趙克寬繼作天順後則

知縣王魯唐韶劉恩又拓而新焉正德蘭谿縣志

正德二年知縣蘇琰作泮橋明年知縣許完教諭

段濂遷學門蘭谿縣志正德十五年郡倖趙天定

掌縣事重修大成殿知縣錢炯踵成之

章懋為記

國朝順治十二年知縣張浩教諭章一奎訓導王萬彥

重修

朱之錫為記

射圃

在明倫堂西後改為啟聖祠

名宦祠

祀洪少卿以下二十一人

鄉賢祠

祀楊與立以下六十五人

社學

圯

仁山書院

在縣西天福山上

萬歷金華府志在仁山下

金仁山先生建何文定公書其扁曰仁山書堂學

者於是受業焉後移建天福山

董遵為記

重樂書院

在縣西
十里

金華府志宋葉克誠先生延

仁山先生講學處

澂東書院

在縣南
鵬鵠塢

續文獻通考宋葉誕讀書所

齊芳書院

在住竿
山之陽

續文獻通考元唐良驥延金

仁山講學於此

東陽縣儒學

在縣治
東南

明一統志宋慶歷間建萬歷

金華府志皇祐元年知縣鮑安上作大成殿明倫

堂

毛維瞻東陽縣學記慶歷初詔郡縣立學天下
丕變幾至於道獨此邑雖有夫子廟隳落卑隘

上露星日使民無所瞻仰明府鮑公至感焉病之謂其寮曰豐屋疎堂非道之強窮檐陋巷非道之喪宮室之奢儉於聖人之道吾未見毫髮損益雖非豈治朝尊儒儒術之意耶將圖再新實惜民費會邑豪之義者請入金以畢其構俟成願遣子弟舍其中從大夫學焉鮑公然其謀經始有期且患舊址迫狹遂闢東南官圃以廣之役興於戊子夏訖於己丑而成既乃哀羨緇撰祭器以給春秋釋奠之用置經史諸子百氏之書以補弦誦之闕廟成民悅父督其子兄携其弟咸執經北面而請鳴呼學所由興矣治所由適矣公政之暇尚考典禮羣肄於廟宮使民觀之而化致此邑為禮遜之國

鮑公其知政之本與

淳熙六年知縣王袂作藏書閣後知縣

趙與憲更造堂齋及先賢祠元至元二十七年按

察副使王侯新之嗣是縣尹郭瑛任謙許思忠趙鉉迭為修建

黃潛為記

明永樂二年知縣詹奎彰增修

成化十五年知縣繆樗又增之嘉靖浙江通志嘉靖四年知縣李邦直毀老君堂闢神道導南山水入泮池東陽縣志嘉靖四十五年知縣陳應春建名宦鄉賢祠隆慶間知縣鄭準更新之萬歷三十年知縣郭一鶚重修崇禎十二年教諭劉振之訓導彭如翱重修

國朝順治六年知縣潘士璜訓導金英重修十七年庠

生吳良棧等建明倫堂學門康熙二年復建先師廟及兩廡修啟聖祠十年庠生李元毅修戟門十

七年知縣胡啟甲重修先師廟十九年知縣俞允

撰成之并建名宦鄉賢祠

趙行撰文廟記吳從臯為名宦鄉賢祠記

射圃

在文廟東今為啟聖祠

名宦祠

祀戴叔倫以下七人

鄉賢祠

祀斯敦以

下五十

社學

在西北隅

七人

南園書院

在縣東四十五里

萬歷金華府志宋蔣友松

建聚書三萬餘卷賓碩儒以教其族黨子弟

圮

石洞書院

在縣南六十里

萬歷金華府志宋郭欽止建

葉適石洞書院記東陽郭君欽止作書院於石洞之下石洞郭氏名山也初洞深複無行徑薪者拾採而已君始以意疏治前阻崖壁衆不知所為欲止君逼視其罅遙聞水聲出空中鑿崖百步梯級而後進土開谷明俄若異境稍復深入臻於曠平則石之高翔俯踞而竹堅木瘦皆衣被於其上水之飛湍瀑流而蕉紅蒲綠皆浸灌於其下潭澗之窪衍阿嶺之嵌突以亭以宇可釣可奕巧智所欲集皆不謀而先成君又蔭茂密以崇其幽植芳妍以絢其陽左右面勢彼此回薄而山之向背曲折陰晴早暮姿態備矣君甚樂之以為山水之美千載而潛譬猶趙壁隋珠璞於外而韞於中其一曰

忽彰何異武陵天台顯於今而閔於昔也既而嘆
曰地之偶出於吾廬非私賜余者吾其可自泰將
使子孫勤學於斯學其可以專盡使鄉黨之秀並
焉於是度為書院禮名士主其學徙家之藏書以
實之儲洞之田為書院之食而斥洞之山為書院
之山示郭氏不敢有也君既卒諸子修之不廢而
請余為記嗟夫郭君遠矣以學易游而不以物樂
厚其身以衆合獨而不以地勝私其家也自君之
為是至今五十年成之之難傳之之久也游之興
廢家之盛衰占焉學之興廢人之盛衰占焉學不
待地也螢燈雪屋苟取尺寸而聖賢之業可成矣
學以知意為始以盡力為終今夫悉其聰明傳之
文字深已造於性命淺亦重於科舉而不能知其
意猶為無所始也將何以終之乎君之子孫與其
鄉人必勉之使玩雲嵐挹泉瀨心形潔清以始其
學而卓異豪傑之材出焉然則學雖不待夫地而

地固有待夫學也慶元四年十一月十四日

崇正書院

在縣東北三里

萬歷金華府志知縣吳翰詞

建

久圮

復初書院

在縣城南

萬歷金華府志知縣趙善政建

八華書院

在縣西三十五里

萬歷金華府志元許文懿

公講學之所許彥洪建

橫城義塾

在縣南十五里

明一統志宋景定五年邑人

蔣沐建延師以訓四方來學之士

方逢辰為記

元至正

間沐四世孫大同重修

胡氏義塾

在縣治南

東陽縣志宋咸淳間邑人胡祐

建

義烏縣儒學

在縣治西南

嘉靖浙江通志舊在縣南宋

慶歷九年令毛維瞻徙縣東崇寧間徙縣西宣和

兵燬紹興八年令張公亥徙縣北萬歷義烏縣志

紹熙四年知縣虞汝翼重建大成殿開慶元年令

趙必升建明倫堂萬歷金華府志景定二年知縣

李補四年知縣林桂發新之元天歷二年達嚕噶齊特哩遷明倫堂於廟後至正元年達嚕噶齊特穆

爾新廟

柳貫為記

三年縣尹周自強築杏壇

黃潛為記

明洪

武三年知縣張允誠建廟學二十九年教諭張復

祖遷明倫堂於廟西三十三年知縣吳祐修正統

間縣丞劉傑知縣劉同相繼修之正德十三年御

史吳華遷今所

自為記

嘉靖十四年通判汪昉修

胡森

為記二十九年知縣汪道昆四十四年同知張書紳

重修崇禎義烏縣志萬歷七年知縣范雋修文廟
明倫堂創尊經閣二十一年知縣周士英重修

國朝順治七年署縣事推官徐振儒建戟門九年知縣
宋雲梯建明倫堂十六年知縣范鼎鉉教諭徐弘
彰建文廟康熙七年知縣孫家棟教諭譚觀成重
建西廡十一年知縣于連復建啟聖祠并鄉賢名

宦二祠

射圃

在明倫堂東

名宦祠

祀王允誠以下一十五人

鄉賢祠

祀顏烏以下三

十三 社學九人所

五雲書院

在五雲山下

萬歷金華府志元大德間樓

如浚建宋景濂嘗遊學其間

圯

永康縣儒學

在縣治西

嘉靖浙江通志宋崇寧間建萬

歷金華府志政和四年令周虎臣新之宣和三年

寇燬紹興十一年令強友諒重建

洪清臣為記

寶祐四

年方夢玉攝縣拓地更新

吳達重新永康縣學記寶祐四年春方君來攝

邑事載見於學顧齋庶仰漏俯濕拜弗容膝感然曰政有先是者耶朝經暮營若饋重負縉紳學士

弗勸而集閱月七告厥成又祀邑之先正襄靖樓
公始正惠林公大中文毅陳公亮以致高山景行
之仰揖諸生而策之曰古鴈山秀水腴斯文之符
也自胡公則開科於瑞拱徐公無黨冠南省於皇
祐先後以行顯文風日起逮於南渡有迭位樞筦
為國柱石者有持崇橐登臺省歷郡麾表表以名
節照世者有首唱廷陞抗中原大義為社稷吐氣
者其他魁偉傑出磊磊相望固不止三賢而已當
乾道淳熙間巨儒元老或自武夷自金華自臨川
自永嘉來遊於靈沼蕭寺之下糲食蔬酒累晷決
夕相與講明聖賢之深緒一草一木經其矚者
猶有光彩聲蹟寔遠風旨尚存得無漱餘芳叩逸
響者乎咸拱手曰敢弗力於是諸生轉相語重請
於予願有述也予乃言曰邑大夫遊刃動中竅節
日創千牛無難也然遽虛其身而棟宇厥士可不
謂知所先後乎哉遂嘗聞為學之要不過明辨義

利而已孟子指雞鳴而起為學者一大期會書謂之幾中庸謂之獨孟子謂之間周子謂之動靜未形一也有能存夫靜以涵動之所察察夫動以見靜之所存一念微差勇鋤勾蔓去其不如舜者就其如舜者庶乎誦詩讀書光昭前哲日溪山而有耀對邑大夫而無慚願吾黨共進焉

元至

元三年寇燬二十九年縣尹苗廷瑞增修復燬延

祐五年監縣沙班重建明洪武三年知縣魏處直

宋顥即元之故學葺成之永樂間知縣魏廉丞歐

陽齊復修正統十四年寇燬知縣孫禮重建成化

七年御史劉珂拓尊經閣址弘治四年知縣王秩

撤齋廡而新之十四年知縣張鳴鳳新廟正德八年知縣黎鐸新學十四年御史吳華同知張齊新饌堂號舍嘉靖三十年知府陳元珂建仰聖興賢坊永康縣志萬歷二年知縣楊德學諭盛於唐知縣吳安國重修

國朝康熙十一年知縣徐同倫訓導雲輔堯重建二十一年知縣謝雲從重修

射圃

在縣治東

名宦祠

祀何炯以下一十四人

鄉賢祠

祀胡則以下三十五

人社學

在舊藩司行臺故址

龍川書院

在縣東六十里龍窟橋

萬歷金華府志宋陳亮

讀書之所

五峰書院

在縣東五十里

萬歷金華府志宋朱文公呂

成公陳龍川舊遊之地嘉靖初邑人應典因為祠以祀三賢知縣洪垣更為書院

綠野書院

在縣東門外

金華府志康熙二十一年知

縣謝雲從允士民請為總督武定李文襄公建

武義縣儒學

在縣治西

明一統志宋崇寧中建嘉靖浙

江通志宋初在縣南紹興十四年令陳一鶚徙今所元至元十三年監縣竒塔特蒙古仍徙縣南十六

年令韓昌復建今所萬歷金華府志至正間尹隋

守中許廣大翁景成相繼新作

張樞為記

明正統十四

年寇燬時布政使楊瓚居守因新之嘉靖武義縣志成化十六年知縣陳奎建奎星閣廣學基十九年知縣曾祿建射圃號舍弘治十一年知縣汪亨

毀妙相寺廊之正德十年知縣胡琬重建明倫堂
十四年文廟大新則御史吳華之功也金華府志
萬歷元年知縣譚音重建學三十三年知縣張國

裳重修

自為記

射圃

在文興橋之南

名宦祠

祀劉元以下九人

鄉賢祠

祀徐邦憲以下一十

六社學

二所並
在城

浦江縣儒學

在縣治
東南

萬歷金華府志宋皇祐六年

知縣楊洙作廟崇寧中即廟作學嘉靖浙江通志

初在縣西南後徙而南宣和七年徙城外萬歷金

華府志淳熙十五年知縣鮑祖文主簿葛采新作

唐仲友為記

嘉定三年復遷縣南今白佛寺址紹定三

年知縣李知退復於廟西斥大之

葉味道為記

端平元

年知縣石孝垓嘉熙元年知縣鄭思聰淳祐十年

知縣張梗寶祐二年知縣何宗姚景定三年知縣

王霖龍咸有修建元大德九年縣尹蔣恕修至元

三年尹林以順更新

柳貫重建浦江縣學聖廟記重紀至元元年莆陽林侯以

進士得邑以臨於茲謂舊廟規制湫隘進吾黨之士而中微之曰庠黌之舍在百里間羸一區而污穢叢陋若是孰思有以奮起而作興之里有耆士張一寧與松江府教授吳貴孫合辭於侯曰願悉吾力毋煩有司而他若有藉於學者亦相率以其資來相於是作櫺星門於泮池之南徙土祇祠於明倫堂之西而堂序齋館門廡庖廡無一之不理越明年告成侯之興是役以禮帥人人亦樂從之後之遊乎斯者周旋揖讓乎其間將因其角弓嘉樹之思而有得乎見聖由聖之一機其感發而興起者宜何如耶

至正十一年尹蕭文質復新明洪武三年

知縣張希顏建造嘉靖浦江縣志永樂九年知縣

戴文彬修嘉靖浙江通志正德七年知縣鄒輓徙

今所十一年知縣郭楠繼成之崇禎浦江縣志萬
歷十四年知縣張而綱典史鄭騏建明倫堂尊經
閣啟聖鄉賢名宦諸祠金華府志萬歷四十三年
知縣黎弘道重建文廟天啟六年知縣蘇國翰重
修崇禎八年知縣吳應台重修尊經閣十一年教
諭王德溥修文廟

國朝順治四年知縣韓文明重建聖廟康熙十八年教
諭顧爾敏訓導金漸雖重修

射圃

在東門橋邊

名宦祠

祀李知退以下二十一人

鄉賢祠

祀楊璇以下四

十一社學

在分司東

月泉書院

在縣西北二里

萬歷金華府志宋政和三年

浚泉構亭咸淳間令王霖龍建月泉書堂立朱呂

二先生祠於泉亭西北元置書院山長後廢明嘉

靖五年知縣毛鳳韶建正堂繪二先生像祀之且

令邑庠生肄業其中

久圮

東明書院

在東明山之陽

萬歷金華府志宋景濂與其

徒方希直講學之所

湯溪縣儒學

在縣治西

嘉靖浙江通志明成化八年知

縣宋約建

吳寬新建湯溪縣儒學記成化庚寅知金華府南海李侯嗣以湯溪置縣既得

請知縣昨城宋君約有事於學校相地於縣治西一里而近曰官山壬辰秋爰興厥功凡為明倫堂東西齋為庖廚為射圃亭若干楹又以學必有廟為大成殿為兩廡為宰牲房若干楹門牆嚴深堦庭高廣凡所創建舉皆如法又明年而功告完遂選民之俊秀者充其中而置書籍繕器用以為講習之資托予文以為記予惟湯溪縣之新者也湯溪之民民之新者也譬若幼子然始而訓之以正言示之以正事自然一言一行皆趨於正久之習與性成而終為賢人君子之歸以之出而用於天

下國家無弗可者也夫有人民而不能教之與未教而遽責其人皆非也故尤不能無望於為師儒

者
萬歷金華府志嘉靖四十五年知縣樂金重修

唐汝楫
為記

湯溪縣志萬歷二十七年知縣林雲龍修

明倫堂

徐用檢
為記

三十年汪文璧修啟聖祠聚奎亭

崇禎十二年知縣羅洪基邑人劉文敬重修

國朝康熙三年知縣柯弼十八年知縣陳獻圖二十四

年知縣譚國樞四十四年知縣殷式訓四十七年

知縣杜光先相繼修

射圃

在學東

名宦祠

祀宋約秦延默二人

鄉賢祠

祀龍邱菴以下五人

社

學

在縣南

衢州府

衢州府儒學

在府治西

嘉靖浙江通志衢州自唐建學於

今所宋宣和二年兵燬守高至臨重建

高至臨重建衢州府

學記衢之學舍最宏壯依郡山西隅山形如龜四
跌盤峙大成殿坐右後跌之南丙向學殿西稍下
移向為巽宣和庚子冬方臘竊發陷睦歛杭次年
陷婺衢處獨衢遭焚劫尤甚尺椽片瓦蕩然無遺
朝廷以至臨有守信復衢效命為守至則招集創
餘開瓦礫俾各辨居界公私作芟舍扶持完養累

月乃蘇將欲化民成俗教養人材因謀諸衆而士之抱英偉者願共力成之初造大成殿次造堂齋閤及庖湍之所靡不周備共力之士盧定葉公弼張因吾點徐惇禮柴邦憲陸達寔大一沈術沈鐫徐執剛教授鍾變實董其成

元初又燬至元十五年教授吳安

朝為屋廟址之上以祀孔子曰燕居二十一年教

授徐夢龍建廟廡

方逢辰重建衢州府儒學記授徐君夢龍以癸未秋來蒞學

事明年乃興作整刷廟前為軒庭四楹為大門八楹又明年作兩廡東西各十有四楹即燕居為講堂堂之東西挾以齋舍各三楹外為櫺星門周為垣墉丁亥訖事諸生於是請記予惟學校三綱四維之所自出所以維持人理以撐柱天地者也故其選任至重今之祿仕者率以為冷曹而舍之徐

君挾其英華果銳之才足以行其志然不以用之
他曹而求自試於斯文之地此其所見已拔出流
輩今以三年之勤卒能易榛
莽而宮牆之厥功雋矣哉
大德八年通判帕克台

羅丹修廟學

鄭鳴鳳
為記

衢州府志延祐七年治中訥

古伯修

洪焱祖
為記

至正六年總管白景亮重修明年

同知崔思誠成之

鄭汝厚
為記

明一統志洪武初重修

弘治衢州府志正統三年同知張琛重建大成殿
十二年知府白琮建號房十四年同知彭瑛建觀
德亭衢州府志景泰七年知府王高天順六年知

府唐瑜相繼成之

吳錫為記

成化十九年知府李汝嘉

重修

章懋為記

嘉靖十年知府李遂改建明年推官劉

起宗成之三十九年知府楊準隆慶三年知府湯

仰修萬歷五年知府陳澗修建明倫堂

趙鐘為記

三十

四年同知朱朝望改建

金學曾改建衛州府儒學記郡學自唐歷宋廟貌如

昨嘉靖中克齋李公來守是郡議稍迤而右以迎江常二水之合尋以遷擢行祠公者失公之意改西向迄今近七十年使吾夫子背辰向夕光景不曜萬歷甲辰朱公朝望亟於衛下車謁廟惻然曰向陽明背幽闇制爾乃易南而西堂高而廟下可乎集卿大夫士庶耆老聲譽遷改鳩工集材不踰

時獲貞珉二馬一即唐李公重新郡學碑記一即弘治乙卯太守饒公所撰諸鄉賢行略越甸廟貌崇廬丹碧黝堊煥然一新再越甸兩廡就堂齋飭泮池連漪重門平直登高眺遠浮流襟帶可俯而挹也

四十四年推官荆茂實修

徐可求為記

天啟五年知

府舒崇功重修崇禎元年知府蔡三復成之

汪慶百為

記十四年知府張文達重修明倫堂造尊經閣

國朝順治七年兵道李際期知府韓養醇重修

徐應秋為記

十七年知府袁國梓修

余恂為記

康熙三年推官孫魯

十年守道梁萬禩三十三年知府王文錦三十六

年知府張濬先後繼修四十七年知府楊廷望重

建

車德輔
為記

射圃

在明倫堂東今
改為崇聖祠

名宦祠

祀江道以下
二百七人

鄉賢祠

祀徐安貞以
下三十六人

柯山書院

在爛柯
山右

弘治衢州府志宋宣和間郡

人毛友子开鄭可簡子待問隱居不仕築室梅巖
扁曰梅巖精舍郡人徐霖仕於朝道不合歸隱著
書郡守游鈞建柯山精舍延霖開講士友羣集景

定壬戌郡守謝奕中復請衍聖公孫孔元龍為山
長後燬於寇丁丑山長徐天俊重建明年改為柯
山書院衢州府志景定間徐囊以監察御史辭祿
養親率衆重興久地

清獻書院

在拱辰門外二里

續文獻通考宋咸淳中郡

守陳蒙請於朝即趙抃故居立書院因以抃謚扁
焉西安縣志明天順三年參議高某郡守唐瑜重
建成化間郡守李汝嘉增修弘治己未郡守沈杰

立祠主祭後祠遷於城北書院遂廢

衢麓講舍

在郡治北

衢州府志明嘉靖戊戌李遂來

守率六庠諸生發明心學聯以講會士民欲承公

教構講舍

孔氏家廟

在郡城南

明一統志宣聖四十八代孫襲封

衍聖公端友從宋高宗南渡賜居衢州紹興六年

詔權以衢州學為家廟宋史高宗紀紹興八年賜

衍聖公孔玠衢州田五頃奉先聖祠事弘治衢州

府志寶祐乙卯郡守孫子秀請於朝建廟城北菱

湖之上後燬遷城南衢州府志明永樂初禮部尚

書胡濙奏遷廟於郡城崇文坊弘治初知府張俊

重修

羅璟為記

嘉靖浙江通志弘治十八年知府沈杰

請官其嫡孫世一人為五經博士主祀事正德十

五年巡按御史唐鳳儀疏徙府治後即故縣學址

為之

謝遷為記

博士歲率其族祭薦如曲阜

國朝康熙二十一年總督李之芳重修

李之芳重修孔氏家廟記自唐

開元後郡邑皆立孔子廟歲時奉祀至於今不廢而為孔氏家廟者獨曲阜與衢州耳曲阜之廟六飛時巡恒循漢世祖明帝故事而宗子之承祀者爵列公侯廟堂車服禮器多存古制瞻仰者如遊三代之世尚矣衢之有廟肇自宋數百年來東南之士不克登洙泗之堂者俎豆羹牆於焉是寄今皇帝御極之十三年滇池弗靖閩孽繼起之芳與大師駐軍茲城先聖闕宮靡獲寧晏今四方既平百廢漸舉爰進庶司以商妥侑於是聖裔五經博士孔行損廣為募助撫軍藩臬以下咸捐貲庀材鳩工郡丞楊道泰董其役歲壬戌八月之芳將班師武林來告成事因展敬庭庶仰惟先聖之道如日月之在天其於廟貌之盛衰固無與然而郵傳道路之整弛入其境者覘治忽焉矧奕奕寢廟先聖之所憑依者乎天子方崇儒重道以昭示海內之芳參師帥之職保此

海邦願偕百爾君子共襄烏革翬飛以式觀瞻且之芳生與鳩氏之墟去鄒魯之鄉不遠登斯堂也琴瑟管絃之聲於是乎在使浙之士民觀感薰陶將見風俗淳美為天下先升堂觀與者寧必陟龜蒙而臻闕里哉

家塾

在府城南

衢州府志推官劉起宗以東嶽祠廢

址建

鄒守益為記

西安縣儒學

在縣治西北

嘉靖浙江通志舊在禮賢門

外明洪武二年知縣何忠徙縣東弘治衢州府志

洪武五年知縣靳達建堂齋射圃正統間郡守白

琮開拓重建衢州府志正德十四年知縣張潤身

遷於宋貢院遺址嘉靖二十三年教諭譚敷遷於

祥符寺址

程秀民為記

三十八年知府楊準重建明倫

堂四十年知縣俞大有遷啟聖祠於明倫堂東萬

歷十七年知縣許國誠修署縣事推官陳三樂成

之

徐一櫟為記

二十四年知縣蔡天相修

鄭有年為記

崇禎

二年知縣賀康載重修

自為記

國朝順治十一年知縣白拱微重濬泮池康熙七年知

縣李忱重修

葉南生為記

十年又修

徐之凱為記

三十年令

鹿祐葺文廟建兩廡明倫堂

朱彝尊修建西安縣儒學記

在禮賢門外一徙於城北再徙於貢院遺址復徙於大中祥符寺規制差備自耿精忠逆命六師致討屯兵於府郭久縣學牆屋皆毀惟文廟僅存梁棟亦圯會進士鹿侯祐來知縣事下車謁廟顧瞻太息乃豫為規畫俾山農之產竹木陶人之治瓦甃鍛冶之攻釘鉸者咸得以其物輸官抵井稅儲興築之具於是鳩工庀材士大夫學官暨其子弟咸率私錢為助葺葺廟宇次營兩廡次建明倫堂然後繚垣牆塗丹粉濬泮池種樹廟庭經始於辛未之秋今年春二月成觀者交悅頌侯之功侯曰未也堂雖成祠與閣未備且曩時賜書未有存者經以載道而學舍無之其可哉乃購犀經疏義凡

百餘家納之廟篋以示學者。噫侯之用心勤矣。夫三衢固仕國也。昔之言經術者若鄭灼之三禮。劉牧徐庸柴翼之易。徐晉卿王宏之春秋。皆是西安產也。西安之俗其君子敏於事士之志於學者不少。特為兵與歲所苦。居無蠶舍。市無書肆。其何所資以講習焉。得侯所購之書貯於學。有不相觀而善相悅而解辨其同異而博喻之者乎。吾知教之所由興必自西安始。爰撫其本末而書之於石。

射圃

在縣東

名宦祠

祀張潤身以下九人

鄉賢祠

祀趙抃以下二十人

社

學

七所四隅各一。二在光遠門外。一在通仙門外。

明正書院

在縣治東

續文獻通考宋汪應辰及子達

寓衢郡守張嶠築室居之後人即此建祠咸淳中

趙孟奎重建

定志書院

在縣學右

衢州府志萬歷中建祀贈給事

張元卿都人士肄業其中

圯

克齋講舍

在龜峰之麓

西安縣志為郡守李公遂建

明嘉靖甲子郡守鄭伯興同知薛應元通判夏寶

重修鄒守益陳九川錢德洪王畿王璣嘗會講於

此

青霞書院

在拱辰門外

西安縣志康熙間為總督李

之芳建以為講學之所

蔡啟傳為記

龍游縣儒學

在縣治西

弘治衢州府志宋慶歷間始創

文廟至和初縣尉劉達元建學後燬宣和七年令

邵洪重建於縣西元至元二十一年鎮守千戶周

旺重建

徐伯彪為記

至順三年達嚕嚕齊徹爾克呼木重

修

徐桂蟾為記

嘉靖浙江通志元末燬明洪武三年知

縣劉庚重建天順四年知縣王瓚修

商輅為記

弘治六

年知縣袁文紀復建於今所

謝鐸為記

萬歷龍游縣志

嘉靖二十一年火明年知縣錢仕重建

自為記

三十

八年知府楊準知縣甘用世重建文廟萬歷四年
知縣涂杰翼以外垣建坊門三座六年知縣江濯
之撤文昌祠建閣又於泮池前濬兩湖衢州府志

萬歷十二年知縣魯崇賢修

秦鳴雷為記

二十五年知

縣郁德據二十九年署縣推官王學孝縣丞潘熙
文相繼修三十六年知縣萬廷謙修崇禎元年知
縣劉日曦修

國朝康熙七年知縣艾朝棟教諭黃濤修余恂為記十二年

知縣許琯十九年知縣盧燦先後重修黃濤楊祖各有記

五十二年知縣孟繼祖重修

射圃在學南名宦祠祀江迤以下九人鄉賢祠祀龍邱萇以下十六人

社學四所一在學西一在王村一在靈山一在湖鎮

九峰書院在縣東九峰山下萬歷龍游縣志唐侍郎徐

安貞讀書處圯

鷄鳴書院在儒學北萬歷龍游縣志隆慶六年知縣

涂杰建二十一年知縣郁德據改為憲臺後改按

察司

楓林書院

在縣南

龍游縣志明督學方應祥集諸

生會文處

在縣北

常山縣儒學

在縣治西

弘治衢州府志舊在縣治東南

宋紹聖丙子令林卞建後遷於縣之西尋廢紹興

辛巳令胡伯能復舊址重建元至元甲午令李亨

建成德堂大德己亥令鄭玉增建齋廡元統乙亥

令李盤重修衢州府志明洪武七年知縣劉利用
建射亭九年知縣李希顏建膳堂十一年縣丞朱
貞立東西二齋永樂元年知縣仇經重建正統十
二年知縣周文重修汪芳為記萬歷常山縣志成化初
提學僉事劉紆命知縣李溥重修嘉靖浙江通志
嘉靖九年知府趙可與建於今所鄒守益為記常山縣
志崇禎間署縣事通判湯瑩重修

國朝順治五年署教諭丁應聘修十四年訓導夏之璫

修知縣王明道成之

孫魯為記

康熙二十一年知縣楊

濬重修

自為記

射圃

在縣治東南

名宦祠

祀嚴思忠以下三十人

鄉賢祠

祀江景房以下

一十
六人社學

三所並
在城

石門書院

在定陽鄉

弘治衢州府志為宋趙鼎立今

遺址存

江山縣儒學

在縣治西

弘治衢州府志舊在縣治東前

俯小河沿河為牆後以言者撤之宋紹興十四年

邑令丁昌朝闢而新之為門造飛梁絕河以渡正

德江山縣志淳熙二年尉熊可量修

朱子江山縣儒學記建安

熊可量為衢州之江山縣尉始至以故事見於先聖先師之廟視其屋皆壞漏弗支而禮殿為尤甚因問其學校之政則廢墜不修已數十年矣於是俯仰嘆息退而以告於其長湯君悅請得任其事而一新焉湯君以為然予錢五萬曰以是經其始熊君則徧以語於邑人之宦學者久之乃得錢五十萬遂以今年正月癸丑始事首作大成殿踰月訖工棟宇崇懸貌像顯嚴位序丹青應圖合禮熊君既以復於其長合羣吏率諸生而釋菜焉則又振其餘財以完厥事列置門戟扁以奎文師生之舍亦葺其舊於是熊君乃復揖諸生而進之使程其業以相次第官居康食弦誦以時邑人有識者

皆嗟嘆之以為尉本以逐捕盜賊為官苟食焉而不恤其事則亦足矣廟學興廢豈其課之所急哉而熊君乃能及是是其志與才為何如耶熹時適以事過邑聞其言則以語熊君曰吾子之為是役則善矣而子之所以為教則吾所不得而聞也抑先聖之言有之古之學者為己今之學者為人二者之分實人材風俗盛衰厚薄之所繫而為教者不可以不雷焉者也予顧不足以議此子之邑故有僞先曰徐公誠叟者受業程氏之門人學奧行高講道於家弟子自遠而至者常以百數其去今未遠也吾意大山長谷之中隘巷窮簷之下必有獨得其傳而深藏不市者為我訪而問焉則必有以當乎此而知所以為教之方矣熊君謝曰是則敬聞命矣然此意也不可使是邑之人無傳焉願卒請文以識茲役而並列之熹不得而辭也因悉記其事且書其說如此俾刻焉既以勵熊君且以

視其徒又以告凡後之為師弟子而食於此者使知所以自擇云爾
嘉定間知縣黃

汝嘉修

章穎為記

嘉靖浙江通志元至元間達魯噶齊瑪

哈穆特徙今所

何夢桂為記

天啟江山縣志延祐初馬

合謀建禮殿齋廡至正庚寅尹宣聖五十三代孫

孔淮重修文廟戟門建講堂兩廡明洪武初知縣

程鵬重建縣丞劉有恒創射圃永樂初知縣潘銳

關東偏為門衢州府志天順間知縣李景修修成

化八年知縣戴璋黃窩二十年知縣何澤二十二

年知縣王進相繼修之弘治八年知縣王奎正德
五年知縣趙遷十一年知縣劉節十四年知縣吳
仲相繼修之嘉靖二十一年知縣黃綸重修三十
九年知縣陳湯敬修明倫堂兩齋及號房隆慶初
知縣余一龍重建明倫堂天啟三年教諭張大基
修啟聖祠六年知縣袁一鼇重修

方應祥
為記

崇禎十

七年訓導梅友松重修

國朝順治九年教諭龔瑛訓導梅夢熊重修康熙六年

知縣萬里侯重建明倫堂邑人鄭文綱重建名宦祠十八年教諭嚴曾業汪珣重建戟門二十一年教諭鍾定訓導沈九如重建櫺星門鄉賢祠二十二年知縣佟國琪建啟聖祠教諭鍾定建習安堂三十四年知縣楊憲教諭朱長吟訓導呂際發重修四十年知縣朱彩重建啟聖祠

射圃

在文廟西

名宦祠

祀熊可量以下十八人

鄉賢祠

祀周穎以下二十人

社學

四所一在寶成寺一在海會寺一在施水寺一在靈寶經堂

景行堂 衢州府志宋淳熙十二年知縣邵浩建

朱子景行堂記江山縣學故有三賢堂以祀正介先生周君穎贈宣教郎徐君揆逆平先生徐君存而令知縣事金華邵侯浩又益以故諫議大夫毛公注贈朝請郎毛公鼎更其扁曰景行之堂而狀其事且為書來告曰願有記也嘉考其狀既知五君子之學行氣節真足以風厲當世而興起後來讀其書又嘆邵侯所以教人者備而待其人者遠也蓋正介之行信於鄉而聞於朝其立言垂訓褒善貶惡又皆足以為後世法雖其事業不得見於當年然其所立已不但為一鄉之善士而已也諫議遭時過主奮不顧身排擊巨奸奪其政柄當是時天下庶幾望至治焉不幸不究其用而廢絕以死有志之士至今恨之然不特為公恨也至於叔頗罵賊不屈以明官守之義宅鄉捐軀敵營以紓

君父之急其事尤難其節尤偉而選平受業程氏之門人得諸心成諸行又能推其說以教人儀刑音旨之傳於今猶未遠也夫以區區百里之間而其先賢之學行氣節可以風厲當世而興起後來者如此可謂盛矣昔人之祀之也其意豈不美哉哉得其三而遺其二又限其目而不使後人復有過泉企及之思也是則識者猶或病之邵侯於此乃能增益而事修之且易其名以致其倪焉孳孳之意而撤其限以示若有待於來者是不亦教其人之備而待其人之遠乎是可書也已抑熹又嘗寓有說焉蓋士有學有德而後其言行有可觀有行有言而後其節義有可貴此士君子立身行道次第始卒之常而不可易者也然人之所禀不同而其所遭亦異故得於身者或無以驗其事成於終者或無以考其初此論世尚友者所以每恨全德之難而欲擇其所從者又不免有多岐之憾也

然則登是堂而有志夫五君子之事者又可不知其
其所務之先後而循序以求之哉邵侯讀大學之
書而有感於絜矩之一言其平居論天下事而有
所不平未嘗不慨然發憤而抵掌太息也然則其
於五君子者固已非苟知之而亦庶幾得其所以
求之之序矣此其為學夫豈偶然而已哉因為之
識其本末而并記此
意以示其學者云

明弘治八年知縣王奎重建

逆平書院

在騎石山下

正德江山縣志舊名南塘在

縣西五里宋逆平先生與朱子講道之所後廢明

正德十五年知縣吳仲改建於騎石山下易今名

朱子弔逆平詩不到南塘久重來二十年山如龜
背擁地與馬鞍連徐子舊書址毛公新墓田青松

似相識無
語重凄然

江郎書院

在縣南
郎山上

正德江山縣志宋祝維建

地

克齋書院

在獨秀
峯西

正德江山縣志侍郎徐復殷

退居學易之所宋理宗御書扁

地

崧山書院

在長
臺鎮

正德江山縣志宋咸淳中邑人

柴氏立

地

清漾書院

在縣
南

正德江山縣志鎮安毛氏建趙

一齋主之

地

集義書院

在獨秀峰西

江山縣志宋著作郎張恪同

弟太學生正恢建

地

仰山書院

在縣南

舊浙江通志明嘉靖間知縣黃

綸即東獄行宮改建

景瀛書院

在石門

江山縣志明周二峰建

留齋書院

在石門

江山縣志明趙方泉建今存石

亭

三益書院

在石門

江山縣志明趙洙建

地

東溪講舍

在寶成寺後

江山縣志明徐東溪講學處

開化縣儒學

在縣治東西

弘治衢州府志舊在縣治西

宋政和間令李光徙縣南

程俱為記

宣和中燬淳熙乙

未令朱慶遷於溪濱元初兵燹至元二十一年令

陳宜孫重建大德元年復以水壞令曹祚建廟宇

齋廡其後延祐泰定元統至正間嘗修理明初知

縣步從信修建

魯貞為記

弘治開化縣志洪武三年知

縣張高建兩齋築射圃十年知縣畢進忠重修成

化二十一年知縣蔣績縣丞陶瓚闢而廣之弘治

六年知縣程倫重建明倫堂嘉靖浙江通志弘治

十四年復燬十六年知縣葉錄重建衢州府志嘉

靖五年僉事孫從一重修

方豪為記

十八年知府李遂

遷於縣東南萬歷三十三年知縣蘇珵復遷於望

極門外鐘山之麓

徐公敬為記

崇禎四年知縣朱朝藩

重修

徐世蔭為記

國朝順治六年知縣朱鳳台修

自為記

康熙十九年知縣

吉祥重修

自丁澎重修開化縣學記古者天子諸侯

刑之事無不在其中不特絃歌洗爵養老勸農鄉射合學以修考藝選言之政也其在詩曰矯矯虎臣在泮獻馘則出師必受成於學及而釋奠以告成功故興崇德化曰文戡定不率曰武先王寓武功於文治之中士所觀而習者無非干戈羽籥之事使作其氣以勵其操往往歡欣鼓舞而不倦者所以收文武並用之材也

今天子臨雍拜道文教誕敷遠被海濫而么膺蠢動尚有逆我顏行者康熙十三年三月閩寇告變東道孔棘吾浙三衢界甌越之衝黠嶺險阨開化僻處閩豫咽喉州將納壑戶為內應脅邑令崔君華欲以城降崔令諸生抱禮器入山野募鄉兵二萬人呼躍破圍城遂復時制府大中丞兵部尚書李之芳奉詔移鎮姑蔑民情大悅賊衆踞木寨營北源

口烽燧遙相望全浙震動公以惟幄重臣親冒天
石勒撫互用分守梁萬禕郡守王弘仁為制府左
右手轉餉臨衝夜不解宵戮力銷鏞中凡三載自
八月已及戌不五日東浙悉平當是時

國家承平日久父老子弟相安於春秋讀法目不見
兵革漸摩於禮義者深且厚一旦猝然有變有以
激發其忠信勇敢之氣故亂可復治而治亦垂久
而無敝獨非庠序之明效乎歸德吉祥來宰是邑
觀學宮鞠為茂草捐貲庀工葺頽圯而新之因從
士民請奉制府尚書李公祠於廟梁少參王郡守
崔邑令得祠焉志不忘也豈非以功在
社稷施及於民之義有合於祀典者與

二十七年

知縣董鐸教諭姚夔重修四十一年知縣韓雲重
修明倫堂四十八年知縣王克興重修大成殿康

熙六十年貢生詹錫武請捐貲重建廟學教諭查

謹訓導陳昕烈具詳各憲明年徙起鳳門內今址

鼎新其制輪奐改觀

覺羅滿保重建開化縣學記

國家設立學宮自京師以至郡邑雖山海遯僻遠
之地莫不有學所以育賢才美風俗法至善也開
化邑在島山中舊有學宮屢廢屢修明萬厯間遷
於城外之鍾山離縣治少遠師儒之絃歌月吉之
讀法不能具舉於是日就頽圯官斯土者有志修
復而力未逮邑孝秀詹錫武奉其父奎光之遺命
銳意營建而學諭查謹偕訓導陳昕烈具文通詳
經如於康熙六十一年三月告成於雍正元年九
月積屋之楹若干而門序正位講藝之堂休息之
廡至於庖湔庠廡咸具用緡錢若干落成之日請

記於余余嘉詹生之孝而趨事之敏也因招開士而告之曰爾知

國家建學之意豈惟是訓詁詞章以為弋取科名之具乎亦教之孝悌而已夫孝者百行之原聖人有言我行在孝經誠使家敦天性之愛戶有罔極之思則風俗醇美修於身型於鄉達於政事舉而措之耳記不云乎事君不忠非孝也蒞官不敬非孝也朋友不信非孝也居處不莊非孝也戰陣無勇非孝也詹生奉其父之緒言揮斥多金以建此廟學爾多士來游來歌以瞻以儀其亦有所觀感而興起乎

今天子以大孝治天下尤尊崇聖教以風動海內崇啟聖之封號加鄉會之恩科廣取進之額數其加意於學校者恩澤至溥而開學適成於斯時大澤將至有聞必先育賢才而美風俗余於開有厚望焉

射圃

在學側

名宦祠

祀楊居仁以下九人

鄉賢祠

祀魏謩以下二十三人

社學

二所一在縣東一在縣西

包山書院

在縣北二十五里

弘治開化縣志宋淳熙間

汪觀國建逍遙堂翼以軒曰聽雨與其弟杞論道

讀書其子浚立書院以祀朱呂二先生後孫繼榮

請於朝賜額包山書院

祀

浙江通志卷二十八

欽定四庫全書

史部

浙江通志卷二十九

三十

詳校官給事中臣戴璐

僉討臣德生覆勘

總校官編修臣倉聖脉

校對官學正臣湯垣

謄錄舉人臣周文彬

欽定四庫全書

浙江通志卷二十九

學校五
書院附

嚴州府

嚴州府儒學

在府治西南

嚴陵志舊在府城東南宋雍

熙二年知州田錫遷於西北景祐中知州范仲淹

建堂宇齋廡嘉祐中知州趙抃置田養士大觀中

知州李陞重新廟學紹興七年知州胡寅盡撤而

新之嘉靖浙江通志乾道五年張栻知州事改學門南向是時呂祖謙為校官士得出兩大儒之門

用是多有聞者

按萬歷府志云紹定淳祐中陸子適王必相繼修葺

元至元

末兵燬明洪武七年知府趙士敏徙今所永樂十

四年大水廟圯知府李興重建萬歷嚴州府志宣

德六年知府徐孔竒建賜書樓正統三年萬觀修

殿廡堂齋闕射圃九年黃澍建觀德亭景泰四年

劉綱重修成化七年知府朱暄加修二十一年同

知廊才建號舍二十三年知府江豫建會饌堂弘

治六年李德恢建正殿

吳伯通為記

嘉靖三十七年韓

叔陽修萬歷元年周鐸重修四年知府陳文煥同

知林休推官周憲增修七年知府楊守仁建聚奎

樓仰聖門

國朝康熙八年知府梁浩然重修二十一年洪水衝頽

知府任風厚重修

射圃

在文廟西

名宦祠

祀宋璟以下十二人

鄉賢祠

祀嚴光以下十二人

釣臺書院

在府城東五十里富春山下

嚴陵志漢嚴子陵耕

釣處宋景祐中知州范仲淹始創祠宇紹定戊子山陰陸子通來知州事闢書院於臺下處僧廬於東偏復葺高風閣置經史子集用訓迪嚴方二家子弟淳祐辛丑金華王佖守郡始闢齋舍延堂長春秋祭而講習焉辛亥知州隆興趙汝歷鑿石累土以廣其地益以棟宇為門三間榜曰釣臺書院歷級而升為官廳左乃先生祠也羊裘軒客星閣

悉仍其舊又以招隱堂廢址為燕居殿下為門廡
曰燕居之門由官廳而右為講堂曰清風堂之北
為複屋曰遂高堂之南臨流為閣曰雲峰煙水為
四齋曰明善希賢尚志修己為鑪亭曰會友山長
堂長有位祭器有庫儲蓄有倉庖湍有所於是延
致衿佩教養其間改登臺路於書院之右山腰有
亭以待憩息東臺舊有亭更為亭西臺對立相望
郡捐帑五萬緡就城為抵質庫月收其息以助養

士明年知州季鏞聞於朝以州學教授兼山長循故實以四仲月率職事致祭守亦時往景定辛酉知州錢可則修治之視舊益勝客星閣久淪於僧舍頽圯滋甚命僧撤其故為法堂更卜爽塏於佛廬之左建焉元至正元年總管羅廷玉山長沈元鼎協力興修屋以間計凡四十有九完舊者曰燕居殿曰祠堂曰清風堂曰招隱堂曰客星閣曰山高水長閣曰遂高樓曰羊裘軒新者曰三公不換

亭曰天下十九泉亭曰錦峰繡嶺亭曰東臺西臺
兩亭甃登臺之路而為門以識之又作門其外榜
曰釣臺曰富春山未幾燬明正統元年知府萬觀
始重建傍闢二軒東曰清風西曰高節榜其外門
曰釣臺山腰仍建錦峰繡嶺亭東西兩臺各構亭
弘治四年知府李德恢撤其舊而易之樹坊表於
祠堂之前視昔加偉

建德縣儒學

在縣治東

新定續志縣有聖廟圯於水宋

嘉定間邑宰陳德一即縣門內東建廟諸葛安節為記淳

祐庚戌宰惠德夫建門廡堂序

王埜重建建德縣儒學記嚴陵負山

帶江為東南佳郡在漢則嚴先生居之在本朝則
范文正公張宣公守之呂成公教之聲氣薰陶士
風日盛建德附於郡惟廟祀夫子中更水毀鞠為
邱墟嘉定癸酉令陳君德一新廟於縣門之東偏
然門廡齋宇未具久為聚訟者偶語地淳祐庚戌
毗陵惠君德夫來宰是邑始作櫺星門以表之復
白郡更卜地於縣治之南而新之郡侯趙公汝歷
捐帑以相其經始京尹資政趙公與憲譏漕集撰
余公天任皆輸財以助其成為齋四曰尊德曰明
德在於左序曰進德曰達德在於右序獨庀廩未
裕蓋將嚴陵志元大德十年尹張紀重修王若水
為記

明洪武六年知縣顧執中撤舊屋而新之鄭濤為記宣

德三年知縣侯康遠修文廟改建明倫堂正統六

年知縣張鐸創後堂甃二橋成化八年知府朱暄

易櫺星門以石柱護以興賢橋以石欄十八年知

縣鄒魯建矩矱堂號房弘治六年知縣農猷構梯

雲樓建德縣志隆慶間知縣周望徙建於城東建

安山麓

周望新建建德縣儒學記建德縣學舊創於秀山之陽宮殿湫隘俎豆弗稱予見而

病之後往來於建安山下見其蜿蜒磅礴原隰平衍四顧回旋川湖襟帶得壯麗之觀焉予曰此勝

地也清淑之氣於是焉鍾二三子舍其舊而新是圖畫卜諸此諸士建之達於三院監司咸下其議尋割榛莽伐林木命工庀材筮日興作經始於丙寅之冬踰年季夏廟先告成其齋廡廊祠以次而

舉萬歷七年知府楊守仁建聚奎樓四十年知縣

郝光輔建文昌祠

國朝順治間知縣鄭應臯張文韜修康熙十一年知縣項一經署教諭事嵇爾勛創造十九年泮水傾瀉知縣夏景松修砌二十一年洪水衝頽知縣戚延裔重修

射圃

同府學

名宦祠

祀沈瑞以下十人

鄉賢祠

祀嚴光以下三十八人

社學

三所一在府治西一在城富壽坊一在興仁門外東關惟富壽坊者存

義學

在民字坊

建德縣志邑侯戚延裔建

龍山書院

在興仁門外

建德縣志舊在拱辰門外燬

國朝康熙十二年知縣項一經建於興仁門外

淳安縣儒學

在縣治東南

嘉靖浙江通志宋至道三年

知縣孫謙建紹興九年縣丞汪仔重建

方聞為記

嘉定

九年令應與權拓地建樞星門

洪璞為記

嚴陵志淳祐

四年知縣趙崇嶠闢二齋五年邑士汪自明建魁

星樓寶祐二年知縣石孝聞盡撤其舊新之置東

西齋

方逢辰為記

元至元元年知縣杜明顯重建禮殿

至正十一年達魯噶齊額伯爾金建明倫堂兩廡

戟門櫺星門增學田明洪武十一年知縣韓鈍建

堂廡

徐壽生重修淳安縣儒學記洪武十年河南韓侯魯伯來宰淳安以廟學歲久不治謀於

丞劉君思學簿張君士廡首葺正殿而增飾之列
極外附於堂廡複廊仰維於楹題敞受業之軒修
祐文閣改櫺星門增創學舍十有四間啟側門以
便出入置別屋以祀中雷復於縣治西闢射圃工

既訖徵文以識其成夫學校王政之本也淳安自昔多產秀民易教易治以其淳而能安故昔人以之名縣邑宰民之父也學官民之師也誠得愷悌之父賢明之師子惠而誘掖之左右夾持交盡其道不特諸生業精行成皆可以任公卿庶民亦且務本力田尊君親上然後興崇養育之實得以下究而無窮益信其為淳而能安之俗不亦善夫

宣德三年教諭王端重建

魁星樓嘉靖淳安縣志正統六年縣丞王永為射

圃知縣洪淵市地為尊經閣未就景泰四年知縣

劉著踵成之成化元年知縣鄧廷瓚建觀德堂六

年魁星樓燬知縣王衡重建

商輅為記

萬歷嚴州府志

嘉靖三年姚鳴建名宦鄉賢祠三十八年海瑞建
櫺星等門增號舍隆慶二年鄭應齡置學田淳安
縣志崇禎戊寅令蕭鳴美重修大成殿茅坤為記甲申
諭曹三仕訓杜朱佐湯有望鼎新堂構

國朝順治間教諭馮紹元重建明倫堂康熙間知縣劉
可仕易殿棟梁于棟如重建兩廡

射圃

在學東

名宦祠

祀賀齊以下一十六人

鄉賢祠

祀方操以下三十九

人社學

三所並
在市坊

石峽書院

在縣東北五里

續文獻通考宋方逢辰講道

之所度宗手詔賜額名

柘山書院

在縣東龍山鄉

嚴陵志宋淳祐間黃蛻即所

居前山以為授徒講學之所

五峰書院

淳安縣志宋黃蛻徐夢高徐唐佐呂

人龍讀書於此敬夫張栻題額後燬明金廷綬重

修

蜀阜書院

在縣西招賢里

淳安縣志宋儒錢融堂講學

之所

雲峰書院

在太平鄉

淳安縣志宋進士吳攀龍建後

人吳欽重建

清溪書院

在縣東

嚴陵志明成化十一年通判劉

永寬建弘治四年知縣劉麓重修舊浙江通志嘉

靖間知縣海瑞改建城隍廟左

圯

仙居書院

在縣遼源深洞嶺畔

舊浙江通志明商輅建

南山書院

在縣南山下

嚴陵志明按察副使邑人應

顓建

賓興書院

在縣西印月池北

淳安縣志明知縣蕭元岡

建舊名鹿鳴書院

吾溪書院

在縣西六十里

淳安縣志明邑人徐楚致仕

依錢融堂故址東為子姓肄業所舊浙江通志嘉

靖間知縣海瑞改建城隍廟左圯

蛟池書院

在縣西七十里蛟池

淳安縣志明邑人王之言

建

雉峰書院

在縣西

淳安縣志明邑人徐楚建後改

為雉峰社學

高山書院

在城隍廟左

淳安縣志明知縣高秉衡為

邑人吳希招建

龍山書院

在縣東二里

淳安縣志明進士方學龍建

瓊林書院

在縣東玉帶山左

淳安縣志明令李光德建

國朝順治十五年知縣張一魁重修

東山書院

在茶坡

淳安縣志方瑞合讀書講學處

桐廬縣儒學

在縣治東北

嚴陵志舊在西塢宋至和中

令侯叔巘徙戴家橋北嘉祐中知縣劉公臣徙於東北之小山即今學基也宣和間燬紹興二十四年知縣趙公侃鼎新寶慶元年知縣趙汝憚建櫺星門紹定六年知縣趙汝驤創御書閣景定三年知縣胡太古構會友樓嘉靖浙江通志元末兵燬明洪武七年知縣毛道重建桐廬縣志正統元年知縣汪榮教諭劉宇宏建成化五年知縣李琛建

大成殿十八年知縣盧勗構號房弘治四年參政
周季麟新大成殿戟門教諭林祐甫建明倫堂正
德六年大成殿燬僉事楊惟康知縣曹珪重建十
三年知縣楊漢建尊經閣嘉靖三十一年侍御汪
九齡建戟門築泮池造學路牌坊萬歷十二年知
縣楊東鼎新崇禎十五年教諭馮公翥重建尊經
閣

國朝順治十七年知縣張如璿康熙二年知縣楊可楫

相繼重修十九年教諭汪曾垣修建

詹惟聖為記

射圃

名宦祠

祀刁衍以下一十二人

鄉賢祠

祀嚴光以下三十七人

社學

即舊稅課司址

滄江書院

在縣西北十五里

嚴陵志唐北部方勛之別

業宋名儒方慤之故居也明徐舫藏書千卷隱居

其中自號滄江散人

王祥滄江書舍記滄江書舍徐君方舟之所居以讀書者

也桐廬濱江為縣君居在縣北距不百武而近蓋唐北部方公勛之別業而宋名臣方公慤之故居君間來屬余為文記其舍壁夫書之在天下博且廣矣聖人之經儒者之傳諸子百家之著述歷代

太史之紀錄以及天文地理陰陽歷律兵謀術數
字學族譜之雜出數落旁行雲初稗官燕談胙語
之並興其為說不同為教亦異而其為書類皆學
者所當讀而通之者也雖然學問無窮歲月有限
誠有不能徧觀而盡識者而惟聖人之經則弗可
以莫之究也是故易以明陰陽之理書以紀帝王
之政詩以道人之性情春秋以示世之賞罰禮以
謹上下之節文樂以通天地之氣運凡先王之道
所以立天下之大本先王之制所以成天下之大
業者皆於是乎在然自厄於秦訓詁於漢聖遠言
湮愈博而愈失時異事易愈變而愈非其流弊有
不可勝言者矣千數百年宋河南程子闢中張子
者出始克實踐精討而聖賢明德之要帝王經世
之規所以垂憲後世者乃大有所發明其後朱文
公張宣公呂成公一時並興而當其時如永嘉薛
氏鄭氏陳氏葉氏閩中林氏永康陳氏後先迭出

各以所學自成其家大抵均以先王之道為已任以先王之制為必行而所以立天下之大本成天下之大業者咸繫然方冊間矣及於今學者顧因儒先講習既明之餘因循苟簡承前襲舊習矣而不察行矣而不著甚者以先王之道為莫之可行以先王之制為無所於用夫然則書自為書人自為人而學為空言矣此其為弊不有甚乎是故學者之於經不可徒誦其文而已也必將求其道以淑諸身明其法以用於世蓋惟誠求而實見篤信而力行然後知人之貴果可以為聖賢果可以位天地育萬物而所學不徒為空言也予夙有聞於此竊嘗有志而願學焉比與君定交錢塘辱遣其子膺從予遊會亟東歸不得與之相講習故因道予所聞者書以授膺以復於君并請揭諸舍壁以記為

藍田精舍

在縣西北四十里藍田山上

嚴陵志宋時里人姚

世傑讀書之所

崇正書堂

在縣治北城隍廟之西

桐廬縣志舊名鏡塘書

院明嘉靖三十五年知縣吳紳改建萬歷元年本府推官周憲重修

鳳鳴高閣

在桐君山

桐廬縣志明萬歷五年知縣李

紹賢創諸生會課於茲

遂安縣儒學

在縣治西

嚴陵志舊在縣南宋嘉祐中令

李廷芝廢長壽僧院以易之熙寧中郡以其室還
僧乃遷先聖像於院之西廡元豐三年通判劉士
彥即監征廨舍以建崇寧中詔州縣建學即廟為
之紹興八年邑人詹至率其里人裒金請於令林
待問新之新定續志紹熙癸丑邑民徐嘉師弗戒
於火因獻地鳩工於縣西改建嚴陵志明洪武三
年知縣張元吉建大成殿宣德七年教諭陳資善
重建明倫堂正統三年縣丞胡海建魁星樓七年

知縣王傑創文昌祠天順三年知縣成禮重建大

成殿

商輅重建遂安縣學大成殿記遂安為嚴善邑風清俗醇夫子之道如布帛菽粟固已家

衣而人食而廟學之設所以扶植斯道而化誘人心者也自宋至今建置修葺之功屢矣而歲月滋久風雨震凌河間成侯禮來宰是邑亟謀所以興造之適徽歛商人販木過縣欣然樂助善材百株於是捐俸鳩工重建大成殿戟門額圯更而新之泮池砌以石橋櫺星門易以石柱門外關地百步為直道祭器樂器之缺者補之宰牲神廚之廢壞者整之師生衙舍之未修者增之經始於天順己卯之春不踰年而告成是役也任其責者令也相之者縣丞王大本主簿楊榮典史施惠贊之者教諭鄒宗道訓導李靜李春於是廟學一新諸生絃誦之聲倍於往昔令可謂知所重矣

萬歷

遂安縣志成化九年知縣張巖斥廢寺地益之十

年知縣朱福重修大成殿二十年教諭蕭玉修二

十三年知縣陳瑞重修

章懋為記

嘉靖二十一年節推

陸愚署縣事重建明倫堂

唐龍為記

隆慶四年知縣周

恪拓地鑿池建青雲樓

汪尚寧為記

六年吳撫謙重建

啟聖祠大成坊置宰牲房

詹理為記

遂安縣志萬歷九

年知縣王道年重修廟廡建櫺星門石柱

詹理為記

十

三年知縣林大柱訓導蔣大祿於泮池外鑿文林

湖二十年知縣林守典重建文廟自為記三十一年

知縣馬呈鼎重修毛一公為記三十四年知縣詹爾達

續修增學田毛一瓚為記三十九年知縣韓晟重修毛一

公為記崇禎二年教授楊時熙改青雲樓為文昌閣

國朝順治十一年知縣高爾修重建戟門十五年知縣

錢周鼎重建明倫堂增置祭器康熙三年知縣姚

永康重修先師廟及兩廡名宦鄉賢祠二十五年

知縣何偉重建先師廟毛際可為記四十八年知縣陳

學孔重修

自為記

射圃

圯

名宦祠

祀路敬潛以下六人

鄉賢祠

祀詹至以下七人

社學

二所俱在城

獅山書院

在縣治東

萬歷遂安縣志宋狀元詹駿故

址其後有巨石屹蹲宋時建亭其上名狀元臺明即其地為公館隆慶六年葺為書院

瀛山書院

在縣治北四十里

萬歷遂安縣志宋熙寧間

邑人詹安闢其孫儀之與朱子論學於此朱子有

半畝方塘一鑑開之句明隆慶三年知縣周恪訪

名賢遺蹟重建

王畿為記

國朝順治間知縣高爾修錢周鼎先後修葺

壽昌縣儒學

在縣治東

嘉靖浙江通志宋初在縣南建

炎間徙今學稍東新定續志嘉定己巳知縣鞏嶠

置田以贍士

徐邦憲為記

嚴陵志元至元乙酉尹李炳

重建明倫堂尉李思誠建兩齋癸巳知縣王瑀重

修

何夢桂壽昌縣儒學記壽昌為嚴中邑邑有庠舊矣宋建炎二年規制有加焉至元丙子寇熾

民室廬俱燼惟夫子宮牆歸然為魯靈光天也甲
中邑令李炳既至之明年首撤明倫堂而新之尉
李思誠復建兩廡齋堂厨湑悉具又建大成門翼
教堂高明亭左翼茶廬右翼琴室登眺者於斯遊
息者於斯而後章甫繼掖翕然知所歸矣惟大成
殿費夥未及議令王瑀諗於衆共圖之經始於壬
辰之三月落成於癸巳之七月視舊制崇五尺加
廣亦如之令吳恕復新像十指繪七十二賢几欄
楯門牖之未完者至是悉完邑長八札簿元弼劉
守中尉梁政典史湯璧學官邵尚翁洪克復徐拭
咸出資相役以底厥成績

明洪武六年知縣彭子冲撤而新之

建尊經閣闢射圃

方道獻為記

正統三年知縣范衷建

會饌堂展學前地十四年主簿邱城教諭鄭文義

拓之景泰六年知縣張瑄移學稍西天順六年縣丞譚遊易櫺星門柱以石成化十三年知縣朱琳改建魁星樓嘉靖浙江通志弘治十五年知縣王

紳徙今所

按壽昌縣志作正德四年督學趙寬徙

壽昌縣志嘉靖元

年知縣江湍為泮池建名宦鄉賢二祠十七年督學陳儒拓之三十九年知縣李思悅大加修造萬歷嚴州府志萬歷五年知縣馬洛拓新之二十六年知縣黎時中建尊經閣

國朝順治十二年知縣陳九德新廟廡康熙九年知縣杜桂重建明倫堂啟聖祠康熙十一年知縣羅在

位重修

射圃

在明倫堂西康熙十年訓導張熙新闢

名宦祠

祀范衷以下四人

鄉賢

祠

祀周文育以下十一人

社學

在城隍廟西

青山書院

在縣西南十里青山

壽昌縣志唐隱君翁洮建

默山書院

在縣西南二里默山

嚴陵志宋慶歷間校書郎

胡楚材建

祀

岑山書院

在縣東北
十里岑山

嚴陵志宋國子監丞鄭彥

建

久圮

蓮谷書院

在縣北
一里

壽昌縣志明國子監助教洪

鼎講學處嘉靖庚申邑侯李思悅扁曰蓮谷先生

書院

久圮

分水縣儒學

在縣
治東

新定續志舊在縣治西宋治平

間令蘇穀遷縣治東宣和兵火廟獨存紹興間知

縣李端民始置門廡後知縣章涓創講堂嚴陵志

明洪武三年知縣余得賢重建正統五年知縣陳

貞重建明倫堂十二年知縣李觀建魁星樓成化

二十年知縣李楫重建文廟兩廡及號房泮池

商略

為記嘉靖浙江通志正德十六年知縣顧瑛徙縣西

嘉靖十五年知府吳世澤知縣林繼皋復徙今所

國朝順治十六年知縣高弘緒康熙二十年知縣李繁

教諭錢世瀧重修

射圃

圯

名宦祠

祀金師古以下四人

鄉賢祠

祀王縉以下十一人

社

學

在縣坊
久圯

興賢書院

在城隍
廟左

分水縣志明嘉靖間令徐鑑

建萬歷三十二年令盧崇勲重建

志學書院

在縣
左

舊浙江通志明萬歷二年知縣

徐鑒建

溫州府

溫州府儒學

在府治
東南

嘉靖浙江通志晉太寧初立

永嘉郡學於華蓋山麓宋天禧三年知州葉溫徙

故九星宮址以為今學治平二年火熙寧初知州
周延雋徙州治西南元祐五年知州范岫復今所
紹興十年又火知州程邁建嘉定七年劉茂潛修

葉適
為記

元延祐間總管趙鳳儀重建稽古閣至正末

兵燬萬歷温州府志明洪武四年郡守湯遜重建
成化丙午郡守項澄修文廟建明倫堂嘉靖浙江
通志弘治十三年知府鄧淮增築學舍嘉靖十三
年知府郁山建明倫堂

王激
為記

萬歷温州府志萬歷

七年郡人參政王叔景重建堂舍

李維楨為記

温州府

志萬歷三十一年邑人王光美重建尊經閣

國朝康熙十一年巡道許重華陳遇主率屬同修教授
李璋率諸生黃芳卿等重修尊經閣二十三年巡
道楊懋緒諸定遠率屬重建

射圃

在舊小教場

名宦祠

祀王羲之以下三十四人

鄉賢祠

祀王景山以下

七十
八人

東山書院

在城南積穀山下

舊傳謝靈運讀書故址巖

石上鐫白雲春草四字前為謝沼旁為池上樓
奇峰翠削古木森羅為城南最勝

國朝雍正七年分巡溫處道王欽福建康樂祠三間九
年巡道芮復傳捐俸千金購民地闢為書院由謝
祠入徑顏曰名教樂地中為閑存堂三間後為靜
虛齋齋西為進修軒軒前有池池上結屋三楹題
曰塵襟可滌入門峭石壁立上有天泉口僅如甕
不竭不溢味極甘冽樓榭廊廡齋舍庖湢罔不具

備次年落成又於山巔建大觀留雲二亭復捐置
塗田二頃供諸生餼膳以垂永久

永嘉書院

在府城西南

續文獻通考宋淳祐中建中

奉宣聖燕居像東室祀伊洛諸儒西室祀鄉先賢

永嘉縣儒學

在縣治東

萬歷温州府志漢晉唐時惟立

府學宋元祐三年令吳君平始建縣學於今址紹

定間令洪備於廟後建堂元縣令蕭玉宋也先王

安貞相繼改建嘉靖浙江通志延祐元年尹何玉

趙搭納重建

柳貫為記

萬歷温州府志明洪武元年郡

守湯遜令韓鈞修闕二十八年令李廷珪創先賢

祠因闕地通街宣德間毀於颶風邑人戴文堡林

斐黃福昌同建

何文淵為記

正統二年令周紀修

黃淮永嘉

縣學記溫郡城內外有九山晉郭璞以為上應北斗城東曰華蓋星之次為文曲縣學在其麓人咸宜之廟學有年興廢不一近歲颶風大作頽敗滋甚前守何公文淵經理修葺功將就緒而有陞擢之命未幾復為風所撓門廡加損禮殿棟梁亦就欹仄正統丁巳春今太守劉公謙來視學謀於衆鳩工庀材擇日興作知縣周紀承命惟謹於是新文廟兩廡改創文昌先賢二祠於中門之右興文

祠於學門之左閱三月訖工舍菜告成淮亦忝預
班列因屬筆為記淮聞地因人勝古有是言吾郡
巨儒如宋王先生景山於伊洛未作之先即倡明
理學是後若周恭叔劉元承元禮皆承伊洛正傳
吳正仲之論諫業正則之宏博蔡行之之不避權
奸薛士龍之明於料敵其餘更僕不能盡述宜乎
學士虞文靖公目為杞梓茂林鳳麟靈囿豈非地
因人勝之謂乎諸生仰荷聖朝培養之深恩承郡
邑官僚作興之嘉惠當思報稱斯為無忝必以禮
義廉恥為立身之大端切劇淬厲以就其德器朝
益暮習以充其才識奮然以前修自期杞梓鳳麟
殆將復見於今日豈特華蓋文曲增輝而已哉

成化十八年令文林闢地重建明倫堂弘治十年

令林廷獻購地重建令汪循成之

李東陽永嘉縣學記

元祐間歷至國朝興替不一顧其舊址後偏道院前迫民居既隘且敞不稱為施教地前知縣林君廷猷圖為改作拓其故而新之首建宣聖廟及左右廡尋擢貳蘇州不果畢而去新安汪君循繼知縣事踵成之於庭之前為戟門旁隙地為庖為庫而廟成又為堂及左右齋旁為號舍前為泮池而橋其上又前為儀門而學成又為名宦鄉賢二祠於學之兩偏凡木石瓊甍之材金碧丹堊縣繪之飾繩啟剝斲構結甃築之用選堅擇良精壯麗數十年之陋一旦為浙東大觀

嘉靖十

五年令李不顯重修四十年廟門及啟聖祠圯四

十五年巡按龐尚鵬郡守李廷觀令程文著重建

萬歷六年邑人王叔果捐貲通修

詹萊為記

温州府志

萬歷十四年令蔣行義建文昌祠萬歷温州府志

萬歷三十二年叔果子光蘊光薦加修

姚永濟為記

國朝康熙八年颶風作盡拔明倫堂廊廡教諭樊遇諸生黃象鼎等以學租重建十七年訓導蔡啟份重建儀門副使高培知縣鄭廷俊造省牲所二十一年教諭王維新訓導蔡啟份監東廊砌甬道

射圃名宦祠

祀蕭景以下二十四人

鄉賢祠

祀王景山以下七十一人

社學

在城十所在廟四所在鄉十八所

東山書院

在華蓋山上

萬歷温州府志宋王儒志講

學所

圯

鹿城書院

在縣東南

萬歷温州府志明郡守鄧淮建

吳寬為記

萬歷十六年郡守衛承芳重建二十四年郡

守劉芳譽新之

雞鳴書院

在縣學文廟西

萬歷温州府志邑令林廷璫

建萬歷十四年令蔣行義重建二十四年令林應

翔重修改曰文昌會館

芙蓉書院

在開元寺

萬歷温州府志郡人侍郎王瓚

讀書於此有芙蓉五月先花遂聯魁及第故名

貞義書院

在五都姚溪

舊浙江通志明郡人大學士

張孚敬奉勅建

松臺書塾

在榮恩堂右

舊浙江通志明郡人張孚敬

建

樂清縣儒學

在寶帶橋南

嘉靖浙江通志宋初在望來

橋東南治平間令焦千之修

自為記

崇寧三年遷望

來橋之西紹興初火五年尉吳芾徙卧龍坊萬歷

溫州府志紹興十五年令趙惇臨拓基址

林李仲為記

淳熙中令袁采重建嘉靖浙江通志元至元三十

一年尹鄭玉徙今所至正末兵燬明初知縣張具

瞻鄔珏王仲璋胡均謙相繼修復萬歷溫州府志

永樂十六年教諭黃黼建文昌祠弘治八年推官

周珙重鼎新焉嘉靖二十年令歐陽震建名宦鄉

賢二祠二十八年殿毀於颶風令楊鑰重建令賀

賁踵成之隆慶五年令胡用賓建啟聖祠萬歷間

令胡汝寧重修

侯一元為記

二十一年張子程復新之

張清明為記

樂清縣志天啟間知縣胡良臣修崇禎五

年明倫堂火令宋光黼重建

國朝康熙十二年令出一駟訓導姜應珪重建文廟明

倫堂啟聖祠教諭吳讓木建東西廡訓導王沆重

建文昌閣

射圃

在縣西隅

名宦祠

祀焦千之以下三十人

鄉賢祠

祀王十朋以下三十人

五
人社學

在四隅四所
在鄉都三十四所

宗晦書院

在縣治東

明一統志宋建舊名藝堂書院

內祠朱文公咸淳中改名宗晦

梅溪書院

在縣東隅

萬歷温州府志即王忠文祠

國朝雍正六年知縣唐傳鉉重修并置塾田以贍士

鴈山書院

在西北谷

萬歷温州府志邑人朱守宣請

建

平陽縣儒學

在縣治東南

明一統志宋慶歷中建萬歷

温州府志元祐間遷鳳凰山下邑人陳彥才之父
獻已業為學基令沈悚建學寶祐四年令陳容修
劉居安為記萬歷平陽縣志咸淳丙戌縣丞喬大有建

大成殿元升州學明復為縣學宣德間颶風壞殿
令章惠重建天順間令王淮成化間令王岳弘治
間令王約楊楷屢增葺之嘉靖五年知縣劉錄建
講堂二十四年知縣彭謹建射圃嘉靖浙江通志
嘉靖三十一年知縣張仲孝重修

薛應旂為記

平陽縣

志萬歷癸卯知縣汪寬改向轉移崇禎甲子知縣
聶于勤更復舊向

國朝順治庚寅教諭莊麟先修祭器明年與知縣馬騰
霄新廟堂十七年推官嵇宗孟偕教諭嚴有德移
泮橋於儒學門外建大魁閣康熙十二年知縣石
金和重修二十二年知縣吳永申教諭葛殿禎重
修二十八年教諭沈雍修明倫堂

射圃

在儒學東

名宦祠

祀汪季良以下四十五人

鄉賢祠

祀黃友以下三十人

社學

在城六所在鄉五十
三所後增三十二所

會邱書院

在南
鴈蕩

舊浙江通志宋陳經正經邦讀

書處朱文公題額

正學書院

在巖
門

萬歷温州府志嘉靖九年令馮

彬建設宋元明先賢十一人像十六年署縣事推

官李夢祥改名東山書院

圮

瑞安縣儒學

在縣
治東

嘉靖浙江通志宋初建崇寧間

徙江濱政和六年令蔡景初復徙今所

許景衡瑞
安縣學記

崇寧元年有詔郡邑皆立學置師弟子員錫以餼廩校其行藝而升貢之有司奔走從事瑞安為溫之支邑廟孔子於縣治之東而迫隘不足以容多士徙於南江之濱山川風氣散漫不收潮濤泛濫牆宇圯壞神人靡寧邑人願復故址政和五年春具以告郡守劉公從之邑令蔡景初為之規畫而丞張宇發實領教事乃斥舊址廣袤三倍撤昔構之卑陋腐敗者凡為重門兩廡殿以嚴像設堂以肄講習齋以處學者累屋為閭以儲經史落成之日稚耆和會瞻仰稱嘆邑之來學者日益衆丞善教導士既知勸乃相與伐石請書其事

紹興十三年令王閭修淳熙

十三年令劉龜從修

陳傳良為記

嘉定四年知縣黃葵

重修

葉適為記

元元貞元年陞州學知州楊承式三寶

柱屢加修至正末兵燬明洪武二年復為縣學知
縣王泰魏本劉巍相繼修復萬歷温州府志嘉靖
丙午令王士翹遷文廟於明倫堂左壬子令劉畿
建尊經閣名宦鄉賢二祠萬歷甲申颶風毀儀門
東廡令章有成重修己亥令傅道唯修復瑞安縣
志崇禎乙亥文廟火教諭沈君禎倡士民重建

國朝順治十四年知縣譚希周訓導朱綸重修康熙二
十二年教諭王者香率諸生建明倫堂知縣周啟

元范永盛先後助之

射圃

在東門內

名宦祠

祀蔡敬則以下一十三人

鄉賢祠

祀林石以下三十八人

人

社學

西峴永豐南社嘉社各一

心極書院

在崇泰鄉仙巖

萬歷温州府志宋陳止齋讀

書所明嘉靖甲寅令劉畿重建

仙巖書院

在崇泰鄉

萬歷温州府志大學士張孚敬

建久

圯

華陽精舍

在仙巖寺左

萬歷温州府志郡人王叔果

叔杲建

羅山書院

在仙巖
壩前

瑞安縣志明張孚敬建

圮

綠芸書院

在城東廣
福寺北

瑞安縣志明教諭沈肇基

集諸生課藝於此

泰順縣儒學

在縣
治南

嘉靖浙江通志舊在縣西明景

泰三年建

邢寬
為記

萬歷溫州府志弘治乙酉推官周

珙令范勉教諭王鑾改遷三峰寺右

潘琴
為記

嘉靖十

年令劉友德以舊軍營地易太平橋王賓王寵住

基遷學三十三年令蔡芝以學後無主山又以學地與三峰寺易因寺為學宮殿廡齋舍規制俱完隆慶三年令吳敦本建名宦鄉賢祠又建土地祠宰牲房崇報祠以祠前空地為射圃泰順縣志萬

歷辛丑知縣張統改今所

劉光復三遷泰順縣儒學記泰邑在景泰初為

枯寇竄逋盤據之所維時洪都德興孫原貞公撫浙躬率兵而窺入其阻耀德明威奏割瑞平二邑之里設立泰順縣建學弘化頓成樂土縣在山僻學址二遷俱未妥歲庚子視縣治之南水遠山迴卜云其吉前任吳門張公工始興而輒去今洎宗孫公繼之即原貞公六世孫也得是邑而喜曰泰

邑先公所創立秦民先靈所培植報國率祖其在
茲行乎見豐宮未就捐貲以佐緩急士民德公無
不予來趨事踰載而殿廡堂舍暨櫺星坊表泮沼
牆垣靡不煥然改觀余惟原貞公之寧亂龔勸海
不能過也洎宗公之重學蜀文翁未多讓
也祖孫踵武澤以世長宜民之不能忘也

國朝康熙九年知縣林天禎訓導金鉉度重修四十年

知縣曹紳訓導吳若庚重修先師廟

射圃

在學東

名宦祠

祀郭顯宗以下八人

鄉賢祠

祀林待聘以下六人

社

學

一十二所在一都二都各一在三都二
在五都三在六都七都各二在八都一

中村書院 續文獻通考宋淳祐中吳子良建

侯林書院 續文獻通考宋淳祐中吳子良建

羅陽書院

在城隍廟南

萬歷温州府志嘉靖間推官

魏一恭令劉友德建

圯

處州府

處州府儒學

在府治南

括蒼彙記初學在擇山之巔唐

元和中李鄴侯繫來守新孔子廟設講堂

韓愈處州孔子

廟碑自天子至郡邑守長通得祀而徧天下者惟社稷與孔子為然而社祭土稷祭穀勾龍與棄乃其佐享非其專主又其位所不屋而壇豈如孔子用王者事龜然當座以門人為配自天子而下北

面跪祭進退誠敬禮如親弟子者句龍棄以功孔子以德因自有次第哉自古多有以功德得其位者不得常祀句龍稷孔子皆不得位而得常祀然其祀事皆不如孔子之盛所謂生民以來未有如孔子其賢過於堯舜遠者此其效與郡邑皆有孔子廟或不能修事雖設博士弟子或役於有司名存實亡失其所業獨處州刺史鄴侯李繁至官能以為先既新作孔子廟又令工改為顏子至子夏十人像其餘六十子及後大儒公羊高左丘明孟軻荀况伏生毛公韓生董生高堂生揚雄鄭康成等數十人皆圖之壁選博士弟子必皆其人又為置講堂教之行禮肄業其中置本錢廩米令可繼處以守廟成躬率吏及博士弟子入學行釋菜禮耆老嘆嗟其子弟皆興於學鄴侯尚文其於古記無不貫達故其為政知所先後可歌也已乃作詩曰惟此廟學鄴侯所作厥初庠下神無以宇師生

所處亦窘寒暑乃新斯宮神降其獻講讀有常不
誠用勸萬萬元祐有師之尊羣聖嚴嚴大法以存
像圖孔肖咸在斯堂以瞻以儀俾不或忘
後之君子無廢成美琢詞碑石以贊攸始
嘉靖浙

江通志宋景祐間守孫沔徙今所

按宋陳孔碩文廟記云威敏之

來實景祐四年迨寶元二年席某已至括蒼彙紀作康定初悞

宣和三年兵燬五

年守黃葆光重建紹興十三年守黃提關六齋郡

人尚書梁汝嘉捐地相之二十五年守鄒翊作櫺

星門咸淳七年守李雷奮重建講堂元至元三年

總管盧景修廟學崇禎處州府志至元二十七年

幹勤好古修明正統七年推官黎諒鼎新大成殿
景泰四年知府張佑重建明倫堂天順五年知府
馬偉重建大成殿成化元年知府周祺創退省堂
增築號房十八年叅議張敷華僉事江孟綸又大
新之二十二年知府郭忠修建正德十三年知府
林富購地增拓之萬歷二十年同知陳其志修呂鳴
珂為記二十八年知府李淳重修李誌為記四十二年知
府鄧士昌重修明倫堂王一中為記四十七年知府陳

見龍重修文廟

王一中
為記

天啟五年同知廖鵬舉相

繼重修崇禎八年大水牆垣衝塌巡道諸葛羲修

葺

國朝順治七年署府推官張元樞重修康熙十六年知府線一信十八年知府李率祖先後重建康熙四十九年壞於風雍正三年督學彭維新重建七年知府姚鈴建崇聖祠

射圃

在名宦鄉
賢祠後

名宦祠

祀李邕以下
三十九人

鄉賢祠

祀周
明以

下六十
五人

義塾

在郡
治南

紫陽書院

在府治南舊
為城隍廟

括蒼彙紀明嘉靖三十

四年知府高超改創

南明書院

麗水縣志康熙三十年知府劉廷璣

建

麗水縣儒學

在縣治西南
擇山之巔

嘉靖浙江通志唐刺史

李繁建以為州學宋守孫沔別建州學此為縣學

宣和間燬紹興十三年令王筠重建 蒼彙紀元

至元二十九年尹韓國寶以擇陡絕而太學吳海

捐地築平建明德堂

林千之為記

明成化間參議張敷

華僉事江孟綸重修嘉靖間知縣吳梓闢學前民

居鑿池崇禎處州府志萬歷二十年知府任可容

修

自為記

二十八年知縣鍾武瑞建文昌閣

鄭汝璧為記

天啟三年巡鹽御史傅宗龍修

王一中為記

國朝康熙十八年知府李率祖知縣王秉義重建

射圃

名宦祠

祀林槩以下九人

鄉賢祠

附府學

社學

七所一在

望京門一在通惠門一在括蒼門一在南明
門一在行春門一在巖泉門一在譙樓傍
義塾

在圭
山

青田縣儒學

在縣治東

明一統志宋崇寧中建嘉靖浙

江通志宣和兵燬紹興九年令艾若訥重建元末

復燬明初知縣耿亮建

宋源重建青田縣廟學記
青田處萬山間跨山為孔

子廟初建於崇寧中迄元至正之末餘二百載而
燬於寇金臺耿君亮來為縣展謁焉則斷礎荒榛
交錯於頽牖之間於是捐俸為倡縣人士慨然和
之輸粟薦貨各視其力為差耿君親自督勸至廢
寢食厥材孔嘉厥石雖堅廟殿崇雄講堂清邃戟
門有嚴齋廡翼如度書之樓貯粟之庾湏房爨室

以次而就緣以周垣壁以修塗始則舊居迫山斜
迤而傾恒病狹隘今則鞏石為級拓而弘之環學
之地編氓所業今則悉購入之西有方塘歲久湮
塞今則浚而治之經始於庚子之歲冬十一月乙
亥訖工於辛丑歲正月辛未復聘名師廣招弟子
員日申五倫之教蔣子先開而樂之相率割田為
養士之助而學之制大備因紀事之成繫之詩曰
維栢建州萬山鬱環賦家定縣割於青田我我學
宮跨山為址伊誰構孽一夕而燬絃歌之區鞠為
草萊白煙涼颼淒其四徂耿君之臨惕焉是懼曰
此教原可使淪墜乃刻其翳乃拓其基乃攻乃治
樹功以時有殿有堂有齋有序有庖有庾其列楚
楚士之來遊既嘆且言昔也荆榛今也豆蓬發政
之機實在興學譬云葭莩應乎葦籥風雨瀟瀟鷄
鳴膠膠不隨世遠唯道之操泮宮之
修詩人頌魯爰勒貞珉以詔千古

括蒼彙紀宣

德間御史楊鐸重修

潘畿為記

正統間教諭張本捐俸

建大成門築露臺徙學門闢學前路成化丙戌知

縣盧傑重修嘉靖戊午燬於寇知縣李楷移福勝

寺址并買民基足之癸亥知縣丁一中復建於縣

東之舊基拓東城挹學於內

何鏜為記

崇禎處州府志

萬歷二十四年知縣林翰英重修二十七年洪水

衝壞學後城三十九年知縣方淡然修城改築於

舊址青田縣志天啟元年教諭鄭奎光建文昌閣

國朝順治六年燬康熙十一年邑紳士捐資於故址重

建十九年火二十年知縣張皇輔復行創建

鄭載
颺記

射圃

在學
西

名宦祠

祀劉芹以下
一十一人

鄉賢祠

祀陳汝錫
以下一十

二社學

在泮池
西地

石門書院

在縣西七十
里石門洞

續文獻通考宋淳熙九

年朱文公提舉常平至此欲居之元至正中廉訪

副使王侯始即謝客堂故址建

久
圯

湖山義塾

在十
二都

青田縣志明季伯益立

劉基湖
山義塾

記青田之山其上四十里有泉匯而為潭由潭入谷十有五里是為高湖之源其上多奇峰絕巘大木之所盤鬱獻奇納秀故士多俊彥室常殷阜季氏其一也有名謙字伯益者好學尚義其家日裕乃謂其人曰人孰不愛其子孫而不知所以愛之者今有良田美宅綿亘阡陌堆金聚帛充斥棟梁自以為用之不竭享之無窮也一旦光銷影鏤而無纖芥之留者何耶驕淫生於富溢而縱欲敗度之子常由不悟前人成敗之跡而自視侈然大也及其顛連困厄於垂老之際傍徨無所容其身雖欲效纖蒲補履以食其餘年且不可得若是者雖其人之不肖抑亦其父兄處之不得其道也今予幸藉先人餘業以自免於凍餒未嘗不惴惴於吾身況能保其子孫故願制產以肇建讀書之所延名儒為師以訓子弟以及姻族之人咸使知學大則修身齊家以用於時小亦不失為鄉里之善士

不亦可乎乃築於其居之側以為堂設孔子像旁
列齋舍翼以廊廡繚以周垣買田若干畝給師弟子
之食萃其族之子弟悉入學焉於是衿佩衣裳
肅肅有容弦誦之音藹藹旁達入其鄉者莫不感
嘆而悅慕若季氏者真知愛其子孫哉由是達於
一鄉一邑以播於天下使人人聞而效其所為將
見比屋皆為賢士大夫而愚不肖者寡矣邑人洪
應求道其事於予且請為之記予既樂鄉里之有
善人而又嘉洪生之樂
道人善也故喜而書之

混元書院

在混元峰之麓

括蒼彙紀明嘉靖間因點易

亭遺址建書院祀陽明先生

心極書院

在大鶴山

括蒼彙紀明嘉靖癸丑提學阮

鶚作心極圖繫以心問一篇頒示浙學知縣李楷
即舊府館改建

新建書院

舊為府館

括蒼彙紀明萬歷丁丑知縣梅

時雨改建

瑞龍書院

在混元峰下

舊浙江通志明嘉靖間知縣

徐瑛建

縉雲縣儒學

在縣治東

嘉靖浙江通志縣故有孔子廟

唐上元元年令李陽冰修宋慶歷四年尉毛維瞻

重修治平中令張簡翼建學宣和三年燬七年令
吳延年重建元至元十四年復燬二十七年簿吳
樟建元末又燬明初知縣劉澤民建括蒼彙紀宣
德二年知縣陳京重修嘉靖二十六年知縣周世
遠復開拓新之田汝成為記崇禎處州府志萬歷四十
二年知縣曾孔遇署教諭繆伯昇重修四十五年
推官李天培重建李誌為記崇禎間火知縣陳世忠重
建

國朝順治五年燬七年知縣項始震建先師廟十七年
知縣汪宗魯建明倫堂康熙十三年寇燬二十年
知縣霍維騰教諭張尚乘訓導陳獻御重修明倫
堂二十二年霍維騰重修先師廟建兩廡啟聖名
宦鄉賢土地祠及泮池櫺星門

射圃

在仙巖寺後

名宦祠

祀李陽冰以下三十一人

鄉賢祠

祀胡份以下三

十七人

社學

在龍津橋南久圯

獨峰書院

在縣東三十里

續文獻通考朱文公至此愛

其山水似武夷嘉定中郡人葉嗣昌建

美化書院

在縣東六十里

續文獻通考朱文公講道於

此嘉熙中縣尉陳實建

松陽縣儒學

在縣治東南

明一統志唐武德中建枯蒼

景紀宋宣和三年燬建炎時知縣徐彭年重建唐

閱繼葺紹興間王叔毛宓增修

吳祇若為記

乾道紹定

淳祐間知縣劉唐褒王圭高彭更相修飾元元貞

二年持嘉顯忠撤舊更新至大四年主簿王友從

加修嘉靖浙江通志射圃侵於民洪武三年復

伯蘇

射圃陽縣學射圃記松陽之有學學之有射圃蓋自宋紹興始元時凡民不得持弓矢故射息而圃亦廢豪族因侵而有之踰八十年有司漫不加省皇帝即位之明年詔郡縣皆興學置師弟子員而講習乎六藝射圃之復雖其時矣令王君會徵赴京師事格不行而提刑按察僉事張公行縣適至乃為按圖籍凡學地之占於民者悉復之正其疆畧夷其畛域樹垣以祭之王君歸謂部使者執承德意返故地於久攘之後幸惠斯文甚厚宜有以示後人夫侯以明之此舜之學政也其人之賢不肖觀其射之中不中見焉故以射致眾眾致而後論士是以三代率由之昔孔子射於矍相之圃觀者如堵使弟子揚觴而致黜者三則僅有存者夫學莫大於射也尚矣矧國家方修文教而稽古定

制焉則射圃之復夫豈細故哉崇禎處州府志正統三年教諭錢

謚建奎文閣

張杕為記

萬歷十年知縣張賽改建於郊

外三十一年知縣劉幹正徙復舊址

鄭懷魁為記

崇禎

二年署縣事通判許有霖重建知縣楊應華成之

王一中為記

松陽縣志崇禎五年知縣楊應華建啟聖

祠十七年知縣張建高建尊經閣

國朝康熙十八年知縣張景留重建

射圃

在學東

名宦祠

祀陳俊卿以下一十六人

鄉賢祠

祀沈晦以下一十七

人
社學

在縣西

明善書院

在縣西二十里

松陽縣志宋淳熙九年朱文

公為浙東常平使者至此講道咸淳間邑人葉再

遇建以祀公

久圯

遂昌縣儒學

在縣治東南

嘉靖浙江通志縣故有孔子

廟在郭西宋皇祐間令何辟非建學今所紹興二

年令鄭必明修括蒼彙紀明成化七年燬通判郭

鼎建明倫堂十年推官趙巡建大成殿二十年知

縣余黼成之主簿文英建櫺星門弘治八年知縣

黃芳重修

吳志為記

正德丁丑又燬教諭戴鑾請於知

府林富重建嘉靖間知縣黃養蒙拓學前地鑿泮

池知縣洪先志修萬歷六年知縣鍾宇淳一新之

崇禎處州府志萬歷七年知縣鍾宇淳建土地祠

聚奎亭十二年知縣王有功建文昌閣十六年燬

十八年知縣萬邦獻重建二十二年知縣湯顯祖

建尊經閣二十三年重建射圃

國朝順治七年教諭鍾天錫修康熙五十年知縣繆之

弼重修

射圃

在河東隅

名宦祠

祀江子一以下一十九人

鄉賢祠

祀龔原以下一十二

人社學

四所四隅各一所東隅社學遷貞烈坊

鳳池書院

在湖山

括蒼景紀明知縣池浴德建

兌谷書院

在北隅郊外

崇禎處州府志邑人包萬有

建

盤溪義塾

在獨山

處州府志邑人朱子堯建

項氏義塾

在縣治北

處州府志邑人項應祥建

龍泉縣儒學

在縣治東金龍峰左

嘉靖浙江通志宋天禧二

年建紹興三年令汪汝則修

季陵為記

龍泉縣志淳熙

丁酉知縣李嘉言改創夫子廟元至元戊寅燬丙

戌知縣金之剛重建明洪武甲寅知縣屈伸建大

成殿成化戊子提學副使劉嶼率府判尹儒述建

明倫堂弘治七年知縣潘組紳售學南地改門創

大成殿闢兩廡鑿泮池建櫺星門戟門新二齋正

德八年知縣夏章易泮池於櫺星門外括蒼彙紀

嘉靖己未知縣瞿繼志重建明倫堂隆慶二年知

縣李祝重修

何鏜為記

崇禎處州府志萬歷十一年知

縣陳應芳重修

何鏜為記

十三年知縣華詔二十八年

知縣章文標重修

王亮為記

射圃地名宦祠

祀傅楫以下八人

鄉賢祠

祀吳戩以下十二人

社學

五所一在縣東隅登仕坊一在縣西隅顯德坊一在縣北隅燈山東一在縣南隅一在橋閣之下

桂山書院

在縣西五里嚴垵

龍泉縣志宋端平間里人

張奉議建

久圮

笏洲書院

在縣南三十里清田

舊浙江通志宋端平三年

建於縣郭溪南元至元後復徙瀆田

久圮

仙巖書院

在縣西五十里漿安村

龍泉縣志宋咸淳間邑

人章公權建

久圮

仁山書院

在縣東二十里都

舊浙江通志明嘉靖三年

知縣朱世忠建

龍淵義塾

在縣西漿安村

龍泉縣志元季里人章溢建

吳氏家塾

在縣北

龍泉縣志明正德三年邑人吳

瑞禧建

鄭氏義學

在縣西

龍泉縣志明隆慶元年義民鄭

佳建置田以贍士

翁氏義學

在縣東

龍泉縣志明萬歷元年邑人翁

景瑗置

慶元縣儒學

在縣東豐山北外城隍廟左

括蒼彙紀宋慶元三

年令富嘉謨建學於清田上村元季燬明洪武間

知縣董大本改建於就日門外天順二年知縣張
宣復遷瀆田故址嘉靖中建城學在城外慶元縣
志成化十年知縣余康建尊經閣隆慶二年知縣
彭适教諭顧翼高議改圖嗣任知縣朱芾乃遷縣
治東萬歷二十一年知縣周道長重修四十二年
知縣郭際美拓明倫堂豎二坊舊浙江通志崇禎
三年知縣陳國璧教諭胡若宏訓導賈應忠改建
今址

國朝順治十二年教諭駱起明康熙二年知縣高嶙四
年知縣程維伊先後重修

射圃

在演武場東

名宦祠

祀富嘉謨以下九人

鄉賢祠

祀吳兢以下十二人

社學

四所一在縣東一在下管一在城東一在九都竹口

松源書院

在縣西隅興賢坊

慶元縣志明知縣沈維龍

命義民吳治建

久圯

雲和縣儒學

在縣治西

嘉靖浙江通志景泰七年僉事

馮靖建括蒼景紀弘治乙丑知縣劉燦重修

廖軫為記

雲和縣志嘉靖己丑知縣陳思順拓舊址而更新

之崇禎處州府志嘉靖丁酉知縣鄒伯貞改徙萬

壽宮萬歷二十三年教諭劉夢齡改復故址建躍

龍橋

項應祥為記

天啟六年知縣葉逢焜重修

王一中為記

國朝康熙二十八年知縣林汪遠重建

射圃

在泮池西

名宦祠

祀顧立以下五人

鄉賢祠

祀王元以下五人

社

學

四所俱在坊都

宣平縣儒學

在縣治東

嘉靖浙江通志景泰三年知縣

李葉建括蒼彙紀成化十八年知縣何昌重修

馬愈

為記隆慶三年知縣艾善更新之

何鏜為記

萬歷間知縣

劉珍葉遺風相繼又新之

俞介為記

射圃

在學內

名宦祠

祀孫原貞以下七人

鄉賢祠

祀吳仕偉一人

社學

在縣南隅

景寧縣儒學

在縣治北

嘉靖浙江通志景泰三年縣令

楊殖宗建

潘琴為記

括蒼彙紀成化庚寅知縣林堦建

東齋及泮橋泮池甲辰知縣高政增建西齋正德

壬申知縣陳傑闢門路起東西廊號房己卯知縣

單珏創鄉賢祠嘉靖庚寅知縣程達創名宦祠庚

子知縣王三接重修

盧勳為記

丙午知縣趙子楫修易

櫺星門柱以石隆慶壬申知縣陳嚴之重建兩廡

戟門鑿泮池拓宮牆萬歷四年知縣林喬松易民

地建門前拓大道

何鏗為記

萬歷景寧縣志萬歷己卯

知縣蕭汝馨建尊經閣癸未知縣姜思閔修殿堂

門廡處州府志萬歷二十三年知縣雷忭重建

項應

祥為記

天啟元年知縣角韶重修

李光縉為記

景寧縣志

崇禎十四年知縣徐日隆於縣北改置新學

國朝順治間知縣林忠順教諭聞斯震康熙間知縣蓋士毅訓導方游龍知縣劉宗沛教諭史鑑知縣張琢高崇夢學諭郁廣學訓方國光歷有創修

射圃

圯

名宦祠

祀楊殖宗以下五人

鄉賢祠

祀潘琴以下四人

社學

九所四在坊隅五在都

崇正書院

在縣東

舊浙江通志明萬歷中建

鶴溪書院

在按察分司前久圯

豸山書院

在縣西里久圯

鵝峰講舍

在文廟

景寧縣志雍正七年署縣事汪

士璜建

浙江通志卷二十九